



唐詩紀事卷第六

上官儀

郭正一

喬知之

喬俛

員半千

任希古

蘇味道

杜審言

郭利正

吳少微

富嘉謨

李福業

王適

李崇嗣

上官儀

字游韶陝州人工詩其詞綺錯婉媚及貴人效之曰上

官體

詠雪詩云禁園凝朔氣瑞雪掩晨曦花明樓鳳閣珠散影娥池飄素迎歌上翻花向舞移幸因千里映還繞萬

年枝

又奉和山夜臨秋詩云殿帳清炎氣輦道合秋陰淒風
移漢苑流水入虞琴雲飛送斷鴈日上淨疎林滴瀝露
枝響空濛煙壑深

又和潁川公秋夜詩云沈寥空色遠葉黃淒序變洞浦
落遵鴻長颺送巢燕千林流夕景萬籟含宵轉峻雉聆
金祇層臺砌銀箭

金祇未詳

王昭君云玉關春色晚金河路幾千琴悲挂條上笛怨
柳花前霧掩臨粧月風驚入鬢蟬裁書待迴使淚盡白
雲天

高宗承貞觀之後天下無事儀獨持國政嘗凌晨入朝
巡洛水堤步月徐轡詠詩曰脉脉廣川流驅馬入長洲
鵲飛山月曙蟬噪野風秋音韻清亮群公望之猶神仙
馬

高宗即位儀為相麟德元年坐梁王忠事下獄死武后
惡之也儀詩中用影娥池時無解其事祭酒令狐德棻
召張柬之等十餘人示此詩柬之對云洞冥記漢武帝
於望鶴臺西起臺曰望月臺臺下穿影娥池每登臺眺
月影入池中使宮人乘舟弄月影因名影娥池亦曰
眺蟾臺令狐德棻嘆其博識

郭正一

定州人永隆中平章事武后專國出刺陝州與張楚金元萬頃皆為周興誣殺之

和太子納妃公主出降詩云桂宮初服冕蘭掖早升筭禮盛親迎晉聲芬出降齊金龜開瑞鈕寶翟上仙桂轉扇承宵月揚旌照夕蜺

喬知之

知之馮翊人武后時為補闕

有綠珠篇云石家金谷重新聲明珠十斛買娉婷昔日可憐君自許此時歌舞得人情君家閨閣不曾關好行

歌舞借人看富貴英雄非分理驕奢勢力橫相干別君此去終不忍徒勞掩淚傷紅粉百年離別在高樓一旦紅顏為君盡蓋知之有寵婢曰碧玉知之為之不婚為武承嗣所奪知之以此歌寄之而末句云百年離別在高樓一旦紅顏為君盡寵者結於衣帶投井而死承嗣見詩大恨知之坐此陷亡

沈佺期贈知之古意云盧家小婦鬱金堂海鷲雙栖玳瑁梁九月寒砧催下葉十年征戍憶遼陽白狼河北音書斷丹鳳城南秋夜長誰知含愁獨不見使妾明月照流黃

通鑑考異云唐曆及本紀殺知之在天授元年據陳子昂別傳云武攸宜討契丹子昂知之為參謀尚在萬歲通天元年子昂有西還至散關答知之詩云昔君事胡馬余得奉戎旃携手同沙塞關河緬幽燕歎此南歸日猶聞北戍邊是時未罷也疑知之死在神功年後或天授初承嗣銜之至是乃殺之耳

喬侶

人日登高云僕本多悲者年來不悟春登高一遊目始覺柳條新杜陵猶識漢桃源不辨秦壑若昇雲霧還似出囂塵賴得煙霞氣淹留華柱人

沈佺期送喬隨州侶云結交三十載同遊一萬里情為契闊生心由別離死拜恩前後人從宦差池起今爾歸漢東明珠報知己

侶武后時學士預修三教珠英知之之弟也開元初為兗州都督長安中卒於襄陽以文詞知名

員半千

隴右途中遭非語云趙有兩毛遂魯聞二曾參慈母猶且惑况在行路心冠冕無醜士賄賂成知己利名我所無清濁誰見理弊服空逢春緩帶不著身出遊非懷壁何憂乎忌人正須自保愛振衣在生塵

半千字榮期齊州人長事王義方義方曰五百歲一賢者生子宜當之因改今名始名慶舉八科皆中累為弘文館學士睿宗立召為太子右諭德表丐骸骨事五君有清白節與王劇路敬淳石抱中武后時同為弘文館學士

任希古

字敬臣棣州人五歲喪母七歲問父何以報母父曰揚名顯親可也乃刻志從學年十六刺史崔樞欲舉秀才自以學未廣遜去後舉孝廉虞世南器其人為弘文學士終太子舍人奉和太子納妃公出主降詩云帝子陞青陛王姬降紫

宸星光移雜佩月彩薦重輪龍旌翻地杪鳳管颺天濱槐陰浮淺瀨葆吹翼輕塵

和長孫秘監伏日苦熱云玉署三時晚金羈五日歸此林開逸徑東閣敞開扉池鏡分天色雲峯成日輝游鱗映荷聚驚翰逸林飛披襟揚子宅舒嘯仰重闈

和東觀群賢七夕臨泛昆明云秋風始搖落秋水正澄鮮飛眺牽牛渚激賞鏤鯨川岸珠淪曉魄池灰斂曙煙泛查分寫漢儀星別架天雲光波處動月影浪中懸驚鴻絳蒲弋游鯉入莊筌萍葉疑江上菱花似鏡前長林代輕幄細草即芳筵文華開翠嶽筆海控清漣不挹蘭

鑄聖空仰桂舟仙

薛元超永徽初為中書舍人薦希古郭正一王義方孟和貞崔融十餘人時論美之

蘇味道

趙州人與里人李嶠號蘇李武后時為相世號摸稜手上元云火樹銀花合星橋鐵鎖開暗塵隨馬去明月逐人來遊妓皆穠李行歌盡落梅金吾不禁夜玉漏莫相催

詠霧詩曰氤氳起洞壑遙裔匝平疇乍似含龍劍還疑秋蜃樓拂林隨雨蜜度逕帶煙浮方謝公超步終從彦

甫遊

又詠虹詩曰紆餘帶星渚窈窕架天濔空因壯士見還共美人沉逸照含良玉神光藻瑞金獨留長劍彩終負

昔賢心

封御史入臺詩云故事推三獨茲辰對兩闌夕林鳴舞屈春草接芳菲盛府題清索殊章動繡衣風連臺閣起霜就簡書飛凜凜當朝色行行滿路威唯當擊隼去

復觀落鵬歸舞屈字未詳

又始背洛城秋郊矚目奉懷臺中諸侍御詩云薄遊忝霜署直指戒冰心荔浦方南紀蘅皋暫北臨山晴關塞

斷川暮廣城陰塲圃通圭甸溝塍礙石林野童來捃拾
田叟去謳吟蟋蟀秋風起蕪葭晚露深帝城猶鬱鬱征
傳幾駸駸迴意披書地勞歌謝所欽

杜審言

和李大夫嗣真奉使存撫河東云六位乾坤動三微歷
數遷謳歌移火德圖識在金天子月開階統房星受命
年禎符龍馬出寶錄鳳凰傳地即交風雨都仍卜澗瀍
明堂惟御極清廟乃尊先不宰神功運無私大象懸八
荒平物土四海接人煙已屬群生泰猶言至道偏璽書
傍問俗旌節近推賢秩比司空位官臨御史員雄詞執

刀筆直諫下樓舡國有大臣器朝加小會筵將行備禮
樂送別仰神仙城闕周京轉關河陝服連稍觀汾水曲
俄指絳臺前姑射聊長望平陽遂宛然舜耕餘草木禹
鑿舊山川昔出諸侯靜無何霸業全中軍掃戰敵外府
絕兵權隱隱帝鄉遠瞻瞻肅命度西河偃風俗東壁挂
星躔井邑扮榆社陵園松柏田榮光朝掩代佳氣曉侵
燕雨霈鴻私滌風行睿旨宣惇夢訪疾苦屠釣採貞堅
人樂逢刑措時康洽賞延賜踰秦氏給恩倍漢家錢擁
傳咸翹首稱觴競比肩拜迎彌道路舞詠溢郊廡殺氣
西衝白窮陰北土玄飛霜遙度海殘月迫臨邊緬邈朝

廷問周流朔塞旋興來探馬策俊發抱龍泉學總八千
卷文傾三百篇澄清得使者作頌有人焉未以崇班閱
而云勝託捐帑材何磊落陋質幾翩翩江海寧為讓巴

渝輒自牽一聞歌聖道助曲荷陶甄

諸侯爭勝託捐未詳

和常承慶過義陽公主庄池五首野興城中發朝英物
外求情懸朱紱望契動赤松遊海鷺巢書閣山雞舞畫
樓兩餘清晚夏共坐北巖幽其一逕轉危峯逼橋斜缺岸
妨玉泉移酒味石髓換羹香綰霧青條弱牽風紫蔓長
猶言行樂少別向後池塘其二携琴遶碧沙搖筆弄青霞
杜若幽庭草芙蓉曲沼花宴遊成野客形勝得仙家往

往留仙步登攀日易斜

其三攢石當軒倚懸泉度牖飛鹿

麝衝妓席鶴子曳童衣園果嘗難遍池蓮摘未稀卷簾

先待月應在醉中歸

其四賞翫奇他日高深愛此時池為

八水背峯作九山疑池靜魚偏逸人閑鳥欲欺青溪留

別興更與白雲期

其五

贈崔融詩云十年俱薄宦萬里各他方雲天斷書札風
土異炎涼太息幽蘭紫勞歌奇樹黃日疑懷叔度夜似
憶真長北使從江表東歸在洛陽相逢慰疇昔相對叙
存忘草深窮巷毀竹盡故園荒雅節君彌固衰顏余自
傷人事盈虛改交游寵辱妨崔羅爭去翟鶴髦更尋王

思極歡娛至朋情詎可忘連騎追佳賞城中及路傍琴
樽橫宴席巖沼卧詞場三川宿雨霽四月晚花芳復此
開懸榻寧唯入後堂興酣鳴鶴舞言洽鳳凰翔高選俄
遷職嚴程已飭裝撫躬銜道義携手戀輝光玉振先推
美金銘舊所防勿嗟離別易行役共時康

贈蘇味道詩云北地寒應苦南庭戍不歸邊聲亂羗笛
朔氣卷戎衣雨雪關山暗風霜草木稀胡兵戰欲盡漢
卒尚重圍雲淨妖星落秋深塞馬肥據鞍雄劔動揮筆
羽書飛輿駕還京邑朋遊滿帝畿方期來獻凱歌舞共
春輝

蓬萊三殿侍宴奉勅詠終南山應制詩云北斗掛城邊
南山倚殿前雲標金闕迥樹杪玉堂懸半嶺通佳氣中
峯透瑞煙小臣持獻壽長此戴高天

子美贈問丘師詩云吾祖詩冠古同年蒙主恩謂審言
以詩問丘以字同侍武后也

審言字必簡襄州人初貶吉州司戶與同僚不叶司馬
周季重司戶郭若訥誣以罪繫獄審言子并年十三因
季重酒酣懷刃刺之季重臨死曰吾不知審言有孝子
若訥誤我亦焉避害審言因此免官還東都則天召將
用之問曰卿喜否審言舞蹈謝恩因作懽喜詩授著作

郎神龍初坐通張易之流峯州入為脩文館學士卒將
死謂宋之問武平一曰吾在久壓公等今且死固大慰
但恨不見替人云與李嶠崔融蘇味道為文章四友審
言卒李嶠以下請加命時武平一為表云審言譽鬱中
朝文高前列是以升榮粉署擢秀蘭臺往以微瑕久從
遠謫陛下膺圖玉宸下制金門收賈誼於長沙返蔡邕
於左校審言獲登文館預奉屬車未獻長卿之辭遽啓
元瑜之悼臣等積薪增愧焚芝盈感伏乞恩加朱紱寵
及幽泉假飭終之儀舉哀榮之典庶弊惟莫棄墜履無
遺乃贈著作郎制曰漢覃恩祐方慶於同時漳浦沉疴

忽歸於厚夜蒿里修文之地永闕音徽蓬山著作之曹

宜加寵數

開階統漢覃
字俱未詳

郭利正

上元云九陌連燈影千門度月華傾城出寶騎匝路轉
香車爛熳唯愁曉周遊不問家更逢清管發處處落梅
花

吳少微

少微和崔日用遊開元寺詩云左憲多材雄故人充鷲
鷲護贈單于使休軺太原郭館次厭煩歌清懷尋寂寞
西緣十里餘北上開花閣初入雲樹間冥蒙未昭廓漸

出欄幌外萬里秋景灼歲晏風落山天寒水歸壑覽物
頌幽景三乘動玄鑰但敷相解言永用忘昏著

少微新安人與富嘉謨齊名友善進士擢第累授晉陽
尉與富嘉謨並拜監察御史時卧疾聞嘉謨亡號哭賦
詩維三月癸丑河南富嘉謨卒予時寢疾於洛陽北里
聞之投枕而起淚霑乎衽簾匍匐於寢門之外病不能
哭仰天而呼曰天乎天乎俾予曷所朋曷可得而見乎
賦詩曰吾友適不死於戲社稷臣直祿非造利長懷大
死人乃通承明籍遇此敦洋春藥厲其可畏皇穹故匪
仁疇昔與夫子孰云異天倫同病一想失茫茫不重陳

子之文章在其始尼父新鼓興幹河岳貞詞毒鬼神可
悲不可朽車轆沒荒榛聖主賢為寶吁茲大國貧詞人
莫不歎美既而病亟歎曰生死人之大分吾何恨焉然
官職十分未作其一乃至是耶慷慨而終

少微為并州長史張仁亶進九鼎銘表其略曰昔者夏
后氏作鼎群牧貢金遠方圖物備諸山澤以禦魑魅厥
後嗣德昏亂鼎遷于商夏之衰也祀不足徵殷既有之
又患失之周德休明神寶不墜百代可繼伏乞陛下光
大而當之若乃崇貴之器金玉之鼎鎔首山發睢上列
太廟序明堂克明靈命以奉上帝非愚臣所敢議也

富嘉謨

明冰篇云北陸蒼茫河海凝南山闌干晝夜冰素彩峨
峨明月升深山窮谷不自見安知採斲備嘉薦陰房涸
沍掩寒扇陽春二月朝始暾春光潭沲度千門明冰時
出御至尊彤庭赫赫九儀備腰玉煌煌千官事明冰畢
歲周在位憶昔沙朔寒風漲崑崙長河冰始壯漫汗峻
增積亭障嗷嗷鳴鴈江上來禁苑池臺冰復開搖青涵
綠映樓臺函歌七月王風始鑿冰藏用昭物軌四時不
忒千萬祀

嘉謨武功人長安中為晉陽尉吳少微者亦尉晉陽有
魏倚谷者為太原主簿時稱北京三傑天下文章尚徐
庾浮俚不競嘉謨少微本經術雅厚雄邁人爭慕之號
吳富體嘉謨終於右臺監察御史張說論其文曰如孤
峯絕岸壁立萬仞濃雲鬱興震雷俱發誠可畏也若施
於廊廟則駭矣

李福業

嶺外守歲詩云冬去更籌盡春隨斗柄回寒暄一夜隔
客鬢兩年催

福業調露二年登第後為御史五王誅二張亦與謀及
誅

王適

幽州人終雍州司功參軍

詠江濱梅云忽見寒梅樹開花漢水濱不知春色早疑是弄珠人

陳子昂列傳時幽人王適見感遇詩曰是必為海內文宗矣

蜀中言懷詩云獨坐年時暮常懷志不通有時湏問影無事即書空棄置如天外生涯似夢中蓬踪猶是客華髮欲成翁跡滯魂逾窘情乖路轉窮別離同夜月愁畏隔秋風老少悲顏叟盈虛悟翟公時來不可問何用求

童蒙

李崇嗣

寒食絕句云普天皆滅焰匝地盡藏煙不知何處火來

向客心燃

覽鏡云歲去紅顏盡愁來白髮新今朝開鏡匣疑是別故人

獨愁云聞道成都酒無錢亦可求不知將幾斗錢得此來愁

陳子昂題李三書齋云灼灼青春仲悠悠白日昇聲容何足恃榮吝坐相矜願與金庭會將待玉書徵還丹應

有銜煙駕共君乘

又酬李參軍詩云弦望如朝夕寧嗟蜀道行

又酬李參軍旅館見贈云昨夜銀河半星文犯邊漢今
朝紫氣新物色果逢真言從天上落乃是地仙人白璧
疑冤楚烏裘似入秦摧藏多古意歷覽備艱辛樂廣雲
雖覩夷吾風未春鳳歌空有問龍性詎能馴寶劍終應
出驪珠會見珍未及馮公老何驚孺子貧青雲儻可致
北海憶孫賓皆與福業酬唱也

沈佺期黃口讚序云聖曆中有勅東觀脩書黃口飛落
鈇槩間奉宸主簿李崇嗣命采花哺之河東薛曜邀余

為讚

唐詩紀事卷第六

唐詩紀事卷第七

高正臣

崔知賢

韓仲宣

周彥昭

高球

弓嗣初

高瑾

王茂時

徐皓

長孫正隱

高紹

郎餘令

陳嘉言

周彥輝

高嶠

周思鈞

劉友賢

于季子

東方虬

駱賓王

盧照隣

王勃勅勅

楊炯

田遊巖

高正臣

晦日置酒林亭詩云正月符嘉節三春翫物華忘懷寄
樽酒陶性狎山家柳翠含煙葉梅芳帶雪花光陰不相

借遲遲落景斜

晦日重宴云芳辰重遊衍乘景共追隨班荆陪舊識傾

蓋得新知水葉分蓮沼風花落柳枝自符河朔趣寧羨

山陽池

正臣廣平人官至衛尉卿習右軍書法睿宗最愛其筆

晦日宴高氏林亭凡二十一人皆以華字為韻子昂為

之序曰有渤海之宗英是平陽之貴威發揮鳳臺而嘯

侶幽贊維川而留宴又曰冠纓濟濟多延戚里之賓鸞

鳳銜鏘自有文雅之客

晦日重宴八人皆以池字為韻周彥暉為之序上元夜

效小庾體詩六人以春字為韻長孫正隱為之序

崔知賢

晦日林亭云上月河陽地芳辰景望華綿蠻變時鳥照

暉起春霞柳搖風處色梅散日前華淹留洛城晚歌吹

石崇家

上元夜效小庾詩云今夜啓城闈結伴戲芳春鼓聲撩

亂動風光觸處新月下多遊騎燈前饒看人歡樂無窮

已歌舞達明晨

韓仲宣

晦日林亭云欲知行有樂芳罇對物華地接安仁縣園

是季倫家柳處雲疑葉梅間雪似花日落歸途遠留興
伴煙霞

晦日重宴詩云鳳苑光吹晚龍樓夕照披陳遵已投轄
山公正出池落日催金奏飛霞送玉卮此時陪綺席不
醉欲何為

上元夜效小庾體云他鄉月夜人相伴看燈輪光隨九
華出影共百枝新歌鍾盛北里車馬沸南隣今宵何處
好惟有洛城春

周彥昭

晦日林亭云勝地臨雞浦高會偶龍沙御柳驚春色仙
翁掩月華門邀千里馭盃泛九光霞日落山亭晚雷送
七香車

高球

晦日林亭云溫洛年光早皇州景望華連鑣尋上路乘
興入山家輕苔網危石春水架平沙賞極林塘暮處處
起煙霞

弓嗣初

晦日林亭云上序春暉麗中園物候華高才盛文雅逸
興滿煙霞參差金谷榭皎鏡碧塘沙蕭散林亭晚倒戴
欲還家

晦日重宴云年華藹芳隰春溜滿新池促賞依三友延
歡寄一卮鳥聲隨管變柳影逐風移行樂方無極淹留
惜晚曦

嗣初咸寧二年第一人登第

高瑾

晦日林亭云試入山亭望言是石崇家二月風光起三
春桃李華鶯吟上喬木鴈徃息平沙相看會取醉寧知
還路賒
晦日重宴云忽聞鶯響谷於此命相知正開彭澤酒來
向高陽池柳葉風前弱梅花影處危賞洽林亭晚落照

下參差

上元夜效小庾體云初年三五夜相知一兩人連鑣出
巷口飛轂下池濱燈光恰似月人面併如春遨遊終未
已相歡待日輪
瑾士廉之孫登咸亨元年進士第

王茂時

晦日林亭云勝踐尋良會乘春翫物華還隨張放反來
向石崇家止水分巖鏡開庭枕浦沙未極清泉賞參差
落照斜

徐皓

晦日林亭云綺筵乘暇景瓊醕對年華門多金埒騎路
引辟人車頻早猶藏葉梅殘正落花藹藹林亭晚餘興
促流霞

長孫正隱

晦日林亭云晦晚屬煙霞遊遊重歲華歌鐘雖戚里林
藪是僊家細雨猶開日深池不漲沙淹留迷處所巖岫
幾重花

上元夜效小庾體詩云薄晚嘯遊人車馬亂驅塵月光
三五夜燈焰一重春煙雲迷北闕簫管識南隣洛城終
不閉更出小平津

正隱序上元之遊云九谷帝畿三川奧域交風均露上
分朱鳥之躔沂洛背河下鎮蒼龍之闕多近臣之第宅
即瞰銅街有貴戚之樓臺自連金穴美人競出錦障如
霞公子交馳雕鞍似月同遊洛浦疑尋稅馬之津爭渡
河橋似向牽牛之渚實昌年之樂事令節之佳遊者焉

高紹

晦日林亭云咲侶入山家臨春翫物華葛絲調綠水桂
醕酌丹霞岸柳開新葉庭梅落早花興洽林亭晚方還
倒載車

紹為考功郎中

郎餘令

晦日林亭云三春休晦節九谷泛年華半晴餘細雨全
晚澹殘霞樽開踈竹葉管應落梅花興闌相顧起沝水
送香車

餘令定州人博學擢第授霍王元軌府參軍事從父知
年亦為王友元軌每日郎家二賢皆入府下不意培塿
而松栢為林也改著作郎卒

餘令善畫唐秘書省內落星石薛稷畫鶴賀知章草書
餘令畫鳳相傳為四絕元和中韓公武為校書郎挾彈
中鶴一眼乃謂之五絕

陳嘉言

晦日林亭云公子申敬愛携朋翫物華人是平陽客地
即石崇家水文生舊圃風色滿新花日暮連歸騎長川
照晚霞

晦日重宴云高門臨冠蓋下客抱支離綺席珍羞滿文
場藻翰摘莫華彫上月柳色藹春池日斜歸戚里連騎
勒金羈

上元夜效小庾體云今夜可憐春河橋多聚人寶馬金
為絡香車玉作輪連手窺潘掾分頭看洛神重城自不
掩出向小平津

武后時酷吏也中宗神龍中詔酷吏陳嘉言等其身已
死自垂拱已來枉濫殺人有官者並令削奪開元中御
史程行謚奏酷吏來子詢等二十三人情狀乞重子孫
不許與官陳嘉言魚承暉皇甫文備傳遊藝四人情狀
稍輕不許子孫近任

周彥暉

晦日林亭云砌奠收晦魄津柳競年華既狎忘筌友方
淹投轄車綺筵迴舞雪瓊醕泛流霞雲低上天晚絲竹
帶風斜

晦日重宴云春華歸柳岸晦景落奠枝置驛銅樹右闌
筵玉浦陸林煙含障密行雨帶珠危興闌巾倒戴山公
下習池

彥暉登咸元五年進士

高嶠

晦日林亭云飛歡寫春望開宴坐汀沙積水含苔色晴
空蕩日華歌入平陽第舞對石崇家莫慮能騎馬投轄
自停車

晦日重宴云駕言尋鳳侶乘歡俯鴈池班荆逢舊識斟
桂喜深知紫蘭方出逕黃鶯未轉枝別有陶春日青天
雲霧披

嶠為司府郎中

周思鈞

北門學士思茂之弟也武后時為太子文學劉偉之賜
死在獄上疏自陳臨誅洗沐神色自若自捉筆為表詞
懇哀到思鈞悵歎其文后惡之貶揚州司倉參軍

和高氏林亭晦日文宴云早春驚柳穩初晦掩萸華騎
出平陽里筵開衛尉家竹影含雲密池紋帶雨斜重惜
林亭晚上路滿煙霞

重宴又云綺筵乘晦景高宴下陽池濯雨梅香散含風
柳色移輕塵依扇落流水入絃危勿顧林亭晚方歡雲

霧披

思鈞以中書舍人卒子瑛為單父令瑛以女適武就生
靖安丞相元衡

劉友賢

晦日林亭云春來日漸賒琴酒逐年華欲向文通逕先
遊武子家池碧新泉滿巖紅落照斜興闌情未極步步
惜風花

已上並高氏林亭之客外陳子昂張錫王勔解琬各在
其門

于季子

漢高祖云百戰方夷項三章且代秦功歸蕭相國氣盡戚夫人

詠雲詩云瑞雲千里映祥暉四望新隨風亂鳥足沅水結魚鱗布葉疑臨夏開花詐待春願得承嘉景無令掩桂輪

季子登咸亨進士第

東方虬

詠春雪云春雪滿空來觸處似花開不知園裏樹若箇是真梅

陳子昂寄東方左史脩竹篇序云文章道弊五百年矣

漢魏風骨晉宋莫傳然而文獻有可證者常觀齊梁詩彩麗競繁而興寄都絕每以詠歎昨見明公孤桐篇骨氣端翔音韻頓挫光英朗韻有金石聲遂用洗心收視發揮幽鬱不圖正始之音復覩於茲

虬武后時為左史嘗曰百年後可西門豹作對

駱賓王

帝京篇云山河千里國城闕九重門不覩皇居壯安知天子尊皇居帝里峻函谷鷄野龍山侯甸服五緯連影集星躔八水分流橫地軸秦塞重關一百二漢家離宮三十六桂殿陰岑對玉樓椒房窈窕連金屋三條九陌

麗城隈萬戶千門平地開復道斜通鳩鵲觀交衢直指
鳳凰臺劔履南宮入簪纓北闕來聲明冠寰宇文物象
昭回鈞陳肅蘭祀璧沼浮槐市銅羽應風迴金莖承露
起校文天祿閣習戰昆明水朱邱枕平臺黃扉通戚里
平臺戚里帶崇墉炊金饌玉待鳴鐘小堂綺帳三千所
大道青樓十萬重寶蓋彫鞍金絡馬蘭窓繡柱玉盤龍
綺柱璇題粉壁映鏘金鳴玉王侯盛王侯貴人多近臣
朝遊北里暮南隣陸賈分金將譙喜陳遵投轄尚留賓
趙李經過密蕭朱交結親丹鳳朱城白日暮青牛繡幃
紅塵度俠客珠彈垂揚道倡婦銀鈎采桑路倡家桃李
自芳菲京華遊俠盛輕肥延年女弟雙飛入羅敷使君
千騎歸同心結羅帶連理織成衣春朝桂樽樽百味秋
夜蘭燈燈九微翠幌珠簾不獨映清歌寶瑟自相依且
論二八千金是寧知四十九年非古來榮利若浮雲人
生倚伏信難分始見田竇相移奪俄聞衛霍有功勳未
厭金陵氣先開石櫛文朱門無復張公子灞亭誰畏李
將軍相顧百齡皆有待居然萬化成應改桂枝芳氣已
銷亡栢梁高宴今何在莫矜一旦擅豪華自言千載長
驕奢倏忽搏風生羽翼須臾失浪委泥沙黃雀徒巢桂
青門遂種瓜黃金銷鑠素絲變一貴一賤交情見紅顏

宿昔白頭新脫粟布衣輕故人故人有湮淪新知無意
氣灰死韓安國羅傷翟廷尉已矣哉歸去來馬卿辭蜀
多文藻楊雄仕漢乏良媒三冬自矜誠足用十年不調
幾遭迴汲黯薪途積孫弘閣未開誰惜長沙傳獨負洛
陽才世稱王揚盧駱揚盈川之為文好以古人姓名連
用如張平子之略談陸士衡之所記潘安仁宜其陋矣
仲長統何足知之號為點鬼簿賓王文好以數對如秦
地重關一百二漢家離宮三十六人號為筭博士帝京
篇曰倏忽搏風生羽翼須臾失浪委泥沙賓王後與徐
敬業興兵揚州大敗逃死此其識也

宋之問貶黜放還至江南遊靈隱寺夜月極明長廊行
吟曰鷲嶺鬱峩龍宮鎖寂寥句未屬有老僧點長明
燈問曰少年夜久不寐何耶之問曰適偶欲題此寺而
興思不屬僧請吟上聯即曰何不云樓觀滄海日門對
浙江潮之問愕然訝其適麗又續終篇曰桂子月中落
天香雲外飄捫羅登塔遠剝木取泉遙霜薄花更發冰
輕葉互凋待入天台路看餘渡石橋遲明更訪之則不
復見矣寺僧有知者曰此賓王也詠月云忌滿光先缺
乘昏影暫流既能明似鏡何用曲如鉤
賓王義烏人七歲能賦詩武后時數上疏言事除臨海

丞怏怏不得志棄官去徐敬業亂以為府屬敬業為檄
武后罪后讀但嘻笑至一杯之土未乾六尺之孤安在
矍然曰誰為之或以賓王對后曰宰相安得失此人敬
業敗亡命不知所之中宗時詔求其文得數百篇
賓王七歲詠鶩云鶩鶩鶩曲項向天歌白毛浮綠水紅
掌撥清波

盧照隣

結交少年場云長安重遊俠洛陽富才雄玉劍浮雲騎
金鞭明月弓鬪雞過渭北走馬向關東孫賓遙見待郭
解暗相通不受千金爵誰論萬里功將軍下天上虜騎
入雲中烽火夜似月兵氣曉成虹橫行徇知己負羽遠
從戎龍旌昏朔霧鳥陣卷寒風追奔澣海咽戰罷陰山
空歸來謝天子何如馬上翁

詠史云昔有平陵男姓朱名阿游直髮上衝冠壯氣橫
三秋願請斬馬劍先斷佞臣頭天子玉檻折將軍丹血
流捐生不肯拜視死其若休歸來教鄉里童蒙遠相求
弟子數百人散在十二州三公不敢吏五鹿何能誦名
與日月懸義與天壤儔何必疲執戟區區在封侯偉哉
曠達士知命固不憂又季生昔未達身辱功不成髡鉗
為臺隸灌園變姓名幸逢滕將軍兼遇曹丘生漢祖廣

招納一朝拜公卿百金孰為重一諾良匪輕廷議斬樊
噲羣公寂無聲處身孤且直遭時坦而平丈夫當如此
唯唯何足榮又大漢昔云季小人道遂振玉帛委閭尹
斧鑕嬰搢紳邈哉郭先生卷舒得其真雍容謝朝廷譚
笑獎人倫在晦不絕俗處亂不違親諸侯不得友天子
不得臣冲情甄負旣重價折角巾悠悠天下士相送洛
橋津誰知仙舟上寂寂無四隣又公業負奇志交結盡
才雄良田四百頃所食常不充一為侍御史慷慨說何
公何公何為敗吾謀適不同仲穎恣殘忍廢誠良在躬
死人如亂麻天子如轉蓬干戈及黃屋荆棘生紫宮郵

生運其謀將以清國戎時來命不遂脫身歸山東凜凜
千載下穆如懷清風
元日述懷云筮仕無中秩歸耕有外臣人歌小歲酒花
舞大唐春草色薰三徑風光動四隣願得長如此年年
物候新

七夕泛舟云汀葭肅徂暑江樹起初涼水疑通織室舟
似泛仙潢連橈渡急響鳴棹下浮光日晚菱歌唱風煙
滿夕陽

鳳杼秋期至鳧舟野望開微吟翠塘側延想白雲隈石
似支機罷查疑泛宿來天潢殊漫漫日暮獨悠哉

照隣字昇之范陽人調新都尉病去官足孿一手又廢
乃居具茨山下自以為高宗尚吏已獨儒武后尚法已
獨黃老后封高山屢聘賢士已獨廢著五悲文以自明
病既久與親屬訣自沈潁水

王勃 勔 勳

裴行儉在吏部見蘇味道王勳曰二君皆後掌銓衡李
敬玄盛稱王勃楊炯盧照隣駱賓王行儉曰勃等雖有
才然浮躁銜露豈享爵祿者炯頗沉默可至今長餘皆
不得其死

勔晦日宴高氏林亭詩云上序披林館中京視物華竹
窓低露葉梅逕起風花景落春臺霧池侵舊渚沙綺筵
歌吹晚暮雨泛香車

勃為文先磨墨數升則酣飲引被覆面而卧忽起書之
初不加點時謂腹稿滕王閣記落霞孤鶩之語至今稱
之其餘甚多如畫棟朝飛南浦雲珠簾暮捲西山雨上
巳云綠齊山葉滿紅曳岸枝銷九日云蘭氣添新酌花
香染別衣又詠風云肅肅涼景生加我林壑清驅煙入
洞戶卷霧出山楹去來固無跡動息如有情日落山水
靜為君起松聲最有餘味真天才也

勔開元中任中書舍人先是五王出閣同日受冊有司

忘載冊文百官在列方知闕禮勅召五吏執管授一時
俱畢

勃為沛王府修撰時諸王鬪鷄勃戲文為檄英王鷄高
宗曰是且交構斥出府勃既廢客劔南嘗登葛情山曠
望慨然思諸葛之功賦詩見情為號州參軍坐罪除名
父福時以左遷交趾今勃往省渡海溺水瘁而卒年二
十九勅勛以事坐誅

楊炯

夜送趙縱云趙氏連城璧由來天下傳送君還舊府明
月滿秦川

張燕公贈別盈川箴云杳杳深谷森森喬木天與之才
或解其祿君服六藝道德為尊君居百里風化之源才
勿驕恠政勿苛煩明神是福而小人不寬畏其不畏存
其不存作誥茲酒成敗之根勒銘其口禍福之門雖有
韶夏勿棄擊轅豈無車馬敢贈一言炯華陰人永隆二
年皇太子已釋奠求豪俊充崇文館學士後為盈川令
說以箴贈行戒其苛至官果以嚴酷稱不為人所多卒
于官中宗時贈著作郎

田遊巖

遊巖云弘農清巖曲有盤石可坐宋十一每拂拭待余

寄贈之云信彼稱靈石居然狎遁棲徘徊承翠巘斌駁
帶深溪夕陰起層岫清景半虹蜺風來應嘯阮波渡可
琴嵇僕也穎陽客望彼空思齊儻見山人至簪蒿且杖
藜宋之問荅云家臨清溪水溪水繞盤石綠蘿四面垂
裏裏百餘尺風泉度絲管苔蘚鋪茵蓆傳聞穎陽人霞
外漱靈液忽枉巖中翰吟卧朝復夕何當遂遠遊物外
候逋客

遊巖京兆人隱箕山高宗幸嵩山遣薛元超就問其母
帝親至其門帝曰先生此佳否荅曰臣所謂泉石膏肓
煙霞痼疾者救赴都拜崇文館學士進太子洗馬裴炎

死坐素厚善放還山

唐詩紀事卷第七

唐詩紀事卷第七

七

